

CONVIVENZA

La bloccada totala

FADRINA HOFMANN

Uss èsi propi capità: jau hai pers mia vita. Nagina tema, jau na discurs ussa betg da mia pel. Jau discurs da mes telefonin. Fin avant paucs dis jau cret che jau n'appartegna betg a quel tip d'uman ch'è dependent dal handy. Ussa sai jau che quai è stà in'illusun. Cun ir a spass cun mes chaun è mes telefonin crudà or da mia giaglioffa che n'era para betg serrada endretg. Badà hai jau quai pir cura che jau era puspè a chasa ed avess stuì cumenzar a lavurar. Las intervistas registresch jau numnadamain cun il telefonin. Ils contacts èn era memorisads sin mes smartphone – mintgatant fatsch jau schizunt las fotografias per mes artitgels cun il telefonin. Nagin handy, nagina lavur.

Cura che jau hai realisà ch'il handy era davent, sun jau daventada in zic gnervusa. Tge far? L'empirim impuls è stà: telefonar cun il numer da chasa a mamma. Natiralmain che jau n'hai betg udi tun. Lura hai jau decidì da chaminar anc ina giada il medem traject. E propi, tar ina storta hai jau chattà mia mascrina e mes faziels da nas da palpìri. Dal telefonin nagin fastiz. Merda, insatgi vegn ad avair prendì cun sai l'apparat. Telefonar na gida nagut, perquai che l'autra persuna na sa betg il code e na po era betg debloccar mes telefonin cun sia pivatella. Ch'il dianter portia! Proxima



idea: telefonar a l'uffizi da rauba persa. Datti quai insumma en nossa vischnanca? Gea, i dat in – e na, in telefonin cun ina crosa co-tschna n'è betg vegnì chattà.

Va bain, nagina panica. I dat bain anc in servetsch da localisar il telefonin? Fin che jau sun vegnida colliada cun la gista persuna che m'ha pudì declerar tge che jau haja da far per vesair nua che mes benedì handy sa chatta, è passà ina bella pezza. «Necessaria è Vossa Apple ID, dunna Hofmann.» Oh Dieu, quella hai jau era sin mes telefonin. «Nagin problem, mamma, i dat apps che tschertgan tes smartphone», ha manegià mes figl tut cool. Stupent. Be che quels ston ins pajar – e mia carta da Visa po be vegnir activada, sche jau dun mes ok via in'app sin mes telefonin ... La bloccada totala. En quel mument hai jau realisà che quasi tut mia vita sa chatta sin in guaffen electronic: lavur, contacts, codes per ma muventar tras la vita. Sche

mes handy manca, vegn mia vita franada.

Tge far dimena? Gist en quel mument che jau hai decidì da giudair anc in pèr uras la quietezza, la naccessibladad, la libertad dad impegn, hai scalinà vi da la porta. In vischin steva là cun mes telefonin en maun. Alleluja! El al aveva chattà sin sia spassegiada e prendì cun sai, al aveva dentant puspè emblidà in pèr uras. Tge surlevtg d'avair puspè enavos mia agenda, mes album da fotografias, mes dictafon, mia banca, mes cudesch da telefon, mia plattafurma sociala digitala ...

In zic pensiva sun jau tutina daventada suenter questa episcoda. Èsi insumma anc pussibel da viver ozendi senza agid electronic? En mia professiun da schurnalista segir betg. En mia vita privata bain, dentant cun insaquantas restricziuns. Il telefonin ha simplifitgà la communicaziun – ed ha fatg da nus dependentas e dependents. Tge hai jau emprendì suenter la perdita da mes handy? Jau hai nudà sin palpìri ils codes e numers ils pli impurtants. Ed jau controllesch ussa garantì mintga giada che jau bandun la chasa, sch'il zip da mia giacca e propi serrà ...

Fadrina Hofmann è redactura tar la «Südostschweiz» e viva cun sia famiglia a Scuol.

La columna «Convivenza» cumpara enfin la fin da quest onn mintgamai il glingdesdi en la Südostschweiz ed en La Quotidiana.